

[Augsburg], 17. Oktober [1568]

An Theodor Zwinger

UB Basel, Fr. Gr. II 27, Nr. 266; Abschrift: G II 37, fol. 198r.
Druck: Gilly, Manuskripte S. 24 (Auszug).

S. Etsi, Clariss[ime] vir, D[omine] et amice colende, inuitus facio, vt te et Philosophia nostra, Harpyis Oporinianis occupatiss[imum] interpellem: tamen veniam ab humanitate tua mihi datum iri spero, qui sim de meis liberis, chartaceis illis quidem, et quauis simia deformioribus, solicitus. Rescripsi per ciuem Basiliensem, assensus tibi sum, vt Isocratem Oporiniani, Ciceroniana Epsicopij imprimerent. De remuneratione ita labore, vt mihi multo maior curae sit, emendata καὶ ἀξιωματικὴ ἔκδοσις. Ascripi tamen, quoniam ita iussisti, vt et duodena exempla singulorum operum, et de binis folijs integris impressis singulos f. Rhenenses postulares. Id si nimium videretur, vt de ternis. Sin id quoque grauarentur, vt ipsi typographi statuerent, quantum aequo animo dare velint et sine incommodo suo possint. Certè quicquid mihi dederint Labor in damno erit. Ego non quaestui, sed reip[ublicae] literariae et existimationi meae qualicunque seruio: οὐκ ἔχον πεπολιτευμένω ἐν τοῖς Ἑλλησιν ἡσυχίαν ὅγειν. Misi etiam specimen Demosthenicum. De his quid expectandum mihi sit, quam primum scire desidero. Et quia rarò isthinc huc nuncij haberi possunt: literas velim Argentinam ad D. Sebaldum Hauenreutterum mittas: à quo sine mora huc perferentur. Quae eò mihi iucundiores erunt, si quod specimen nugarum mearum videro. Scire etiam cupio, quemadmodum se Oporiniana negocia habeant? E bibliopolis nostratib[us] spe meliora audiui: Haereditatem esse f. 18000 aes alienum 12000. et ipse mihi abhinc triennium narrabat, sibi dissoluto omni aere alieno, amplius 8000 f. superfore. Quod si ita est, Immanueli nostrum gaudeo οὐκ ἄκληρον τῶν πατρώων ἐσόμενον. Vale et D. Carino S[alutem]. 17. Octobr[is].

Hiero[nymus] Wolfius
Tuus.